



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa*

*Tribunál Distritál Dili*

*29 Abril 2015*

**Tribunál kondena pena prizaun tinan 8 ba arguidu iha kazu violasaun seksuál hasoru nia-namorada**

Iha 23 Abril 2015, Tribunál Distritál Dili prejide leitura akordaun no kondena arguidu FC ho pena prizaun tinan 8 tanba provadu komete krime violasaun seksuál hasoru nia-namorada, iha Distritu Liquiça.

Ministériu Públiku akuza arguidu kontra artigu 172 Kódigu Penál kona-ba krime violasaun seksuál.

Iha julgamentu arguidu nega faktu sira iha akuzasaun no deklara katak arguidu ho lezada nu'udar feen-laen no sira hela hamutuk durante tinan 2 ona. Arguidu mós deklara katak hola ona rai no halo uma ida ba lezada.

Enkuantu lezada iha nia depoimentu kontinua konfirma faktu hot-hotu iha akuzasaun ministériu públiku nian no deklara katak durante ne'e arguidu no lezada iha relasaun namora deit laloos feen-laen.

“Desizaun ne'e representa progresu ida iha setór justisa tanba tribunál rekoñese no konsiente katak kualker forma violénsia seksuál iha relasaun intimu saída deit nu'udar krime tuir enkuadramentu legál Timor-Leste nian,” dehan Luis de Oliveira Sampaio, Diretór Ezekutivu JSMP.

Iha artigu 2 alinea 2 letra (b) Lei Kontra Violénsia Doméstika kona-ba konseitu violénsia doméstika defini katak ,

*ne'ebé obriga atu asiste, mantein no partisipa iha aktu seksuál ka intimu ida ne'ebé lakohi, mesmu ke kaben nain, bainhira iha hatauk, ameasa, koasaun ka uza forsa, ka limita no hamate direitu seksuál no reprodutivu sira nian;*

JSMP hanoin katak desizaun ne'e nu'udar rekoñesementu ida ba violasaun seksuál ne'ebé akontese iha relasaun saída deit nu'udar krime inklui relasaun entre feen ho laen no relasaun ho forma intimu sira seluk.

JSMP dezafia ema hotu liliu membru família ne'ebé hetan krime hanesan atu lori ba tribunál hodi prosesu tuir lei ne'ebé vigor nune'e bele prevene krime hanesan akontese iha uma laran. JSMP mós husu ba ema hotu atu konsenti hodi hado'ok hahalok hanesan hasoru nia membru família, namoradu ka ba ema seluk tanba viola ema nia direitu integridade pesoal no direitu atu halo relasaun iha liberdade no mutual.

Tribunál prova katak iha 19 Juñu 2013, lezada hein hela kareta atu ba servisu fatin. Iha momento ne'eba arguidu tun husi taxi no dada lezada tama ba taxi laran, lori lezada ba iha parte Liquiça nian. Wainhira too iha fatin izoladu ida, arguidu para tiha taxi no haruka lezada tuur iha kotuk, arguidu hahu kaer iha lezada ninia orgaun sensitivu, no ho obriga hodi halo relasaun seksuál ho lezada.

Bazeia ba deklarasaun lezada, depoimentu husi testamuña LM, relatóriu mediku husi Pradet, tribunál konklui prosesu ne'e no kondena arguidu ho pena prizaun tinan 8.

Kazu ne'e rejista iha tribunál ho Nú. Prosesu: 0050/13. PNSIC. Julgamentu ba leitura akordaun ne'e prejide husi representante juis kolektivu Dr. Antonio Helder do Carmo. Ministériu Públiku representa husi Dra. Simoa da Costa (prokuradóra estajiáriu). Arguidu hetan defeza husi Dr. Marcelino Coro husi advogadu privadu.

Atu hetan informasaun kompleitu bele kontaktu ba:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
[info@jsmp.minihub.org](mailto:info@jsmp.minihub.org)  
Telefone:3323883 | 77295795